

禹縣  
居城記



上海图书馆藏书



A541 212 0011 00548



禹縣屠城記

162317

嗟夫天下至慘痛之事孰有過於斷脰洞腹躬被殺戮者乎然自僕視之以較伏處於烈燄彈雨中目睹白髮黃口故舊親戚引頸受刃於哀乞號呼之下腸斷心碎其慘痛實遠不如嗟夫僕之餘生誠不若吾故舊親戚之忍痛須臾一瞑而不知也僕本禹籍地屬中州家傳詩書居在城市兵火流毒飛天狗於秦中燒劫沉灰換紅羊於歲暮胡賊景翼者臍可燃燈蔚若喘犧性凶水草力負牛羊河山百二厲氣則鍾於綠林戌卒萬千鈎爪則伸夫河朔巧竊民黨之名小人反覆妄樹二軍之號大盜猖狂世人不察多予恕詞乘時貪功竟督豫省入豫以還野心益肆既得隴而望蜀強干民政欲鋸牙而食肥故縱軍卒大河南北交通要區光天化日越貨殺人脂膏已罄徵求無止劫掠未快誅夷又加馴至乃有旅長曹士英團長王祥生禹縣屠城之事嗚呼痛哉慘贖茫茫人間何世叔兮伯兮豫民何辜夫國民非止一軍也馮

博  
書  
藏  
圖

禹縣屠城記

公煥章首倡大義戡定京華秋毫無犯紀律肅然所謂一軍者若此孫公禹行克復保定闖闖不驚遣師渡河鷄犬無擾所謂三軍者若彼顧二軍果何如乎民黨者軍閥之絕不相容也諸烈士之碧血孫先生之辛勞一視同仁三民號衆瘡痍在抱飢溺爲懷顧胡景翼又何如乎以民黨而繩之實爲蟲賊以國民軍而律之尤屬敗類僕雖孤陋亦嘗側聞民黨與國民軍之風矣若胡景翼之行爲及其軍隊之殘暴僕決不信民黨與國民軍者猶容忍而是認之然而彼固覲然人面假名曰民黨竊號曰國民軍以濟其窮凶極惡荼毒吾禹至此極矣此其罪之所以愈不可恕眞可爲中華民國痛哭流涕者也且吾民之所望於革改者期彼善於此耳頻年來吳佩孚李濟臣等不過忽視民瘼肆其取求而鰥寡孤獨猶得苟全性命顧今日豫局其勢若何風雨窶魄人不保其朝夕陰寒夜哭屍每橫於郊原欲求如曩昔之賣妻鬻子偷生旦暮間今且家破人亡不可復得矣是吾民之所望適與所期反嗟

吾鄉賢孰知君等努力革改之成功乃益陷桑梓于萬劫不復乎哀哉夫吾豫與秦非但唇齒之依實爲兄弟之邦商賈往來幾遍全省姻姪聯結豈止萬家哉我父兄或爾尊長淫人妻妾或爾姊妹彼張獻忠之流實無人性原不可以此相喻而動其憐惻然人道猶重于異國公理自在乎衆心昔獻忠屠川蜀梁成書萬流含怒羣類傷懷神憤天誅撲殺此獠僕生不辰不自先後耳聞目睹躬離兇殘驚燐火之宵飛悲營魂其不反追爲此記聊以誌實蒼蒼者天芸芸者衆其昭其大罰而伸其公道乎魂兮歸來實式憑焉至若射聲垂仁廣漠流渥尤望當代君子憐而施之

余禹縣儒生也今年五十有二矣家貧筆耕自活既鮮兄弟又無子女山荆少余者二歲去春疫亡老屋數楹臨南街而居余祖余父之遺也余教讀于鄉自室入亡後形單影隻毫無牽掛以故恒數月不歸而宅舍則借于鳳翔某君某君者曹旅長士英部某營之書記官前歲曹旅來駐禹縣某君隨之來未幾其

眷屬亦至余家唯夫婦二人餘屋數間雖破敗尚可蔽風雨經友人作介借某君居焉某君亦讀書種子春秋正盛賦性豪爽妻亦田家女一子甫三齡同居後余妻酷愛其子代爲撫抱未嘗離懷某君夫婦亦以余二人年事長敬禮有加一門雍雍幾如家人余妻病時某君夫婦求醫問卜無間朝夕歿尤料理殮葬痛哭失聲余甚感之故即以房舍反託某君有時自館歸儼然作客幾不知誰爲賓主矣曹士英奉調北上某君隨營留守嘗爲余言此等軍隊敗則搶刦勝亦搶刦任至何地習性難易實不能久與同處頗思他適唯與君不免戀戀耳臘月十五日余解館歸某君又語余早擬辭職嗣聞旅長被倅榆關未便求去及胡督辦電請奉方將旅長釋還急繕呈遞上而旅長又奉督辦命招編成旅仍駐禹縣已令王團長祥生先行回禹從事招募現人數將足除收編之土匪各自帶鎗外其餘皆係徒手聞旅長與王團長正設法補充鎗械不久可復舊觀且聞督辦曾面許旅長但能有槍即擴充爲師亦可以致又未能邀准余

亦以長官既加挽留自應少安以答知遇況將成師後望方賒何必亟亟爲勸某君舍之臘鼓勿歛余雖子然一身亦須略有擇擋故與某君不復更談及此而孰知乃有二十八日之禍

禹縣舊屬開封居京漢路之西去和尙橋站四十餘里在鄭州之西南許昌之西北治西略有關陵餘皆平坦焉城頗巨共爲四門中央爲十字街其南曰南街北曰北街東曰東街居民所聚人煙稠疊西曰西大街商賈輻湊店肆櫛比精華之所萃繁盛之要區也在昔交通梗阻疆域修長各地所產必擇一適中之所以通其有無河南綰轂南北樞紐東西如布如茶咸有專市其他百物亦以類從禹縣者藥材之所聚其始也亦不知其時關東之芥川西之麝金石草虫麝所不備次爲牲蓄次爲棉布交易四方商旅雲屯即以錢業一項而言資二三十萬者十餘家三數萬者倍之禹商旣繁富如此而河南十餘年來盜匪縱橫富庶所在垂涎尤切以故商戶住民衛備彌周出資購械攤餉募衆警察

商團數約千餘部勒訓練咸有法規領警團者趙姓名青雲人極忠誠前後服務已十餘載前年白狼之役趙以衆扼守西街苦戰數日將匪擊退縣以保全衆甚德之自曹旅到禹迫責供養二年之間逾五十萬而兵卒橫暴動施野行商民知兵之危故依賴警團之心益切仰恃趙君之念益殷曹王駐禹久警團情形器械多寡皆所素悉此番奉命回禹唯一企圖首在警團槍械次則收之民團不但可以成旅若加強迫兼可隨成師之願乃與團間長王祥生謀先商明胡督辦薦其副官杜文傑於警務處接替趙青雲充任武警隊長以便吸收地方槍支及警務處命下商民請月以隊長全俸奉杜唯求勿令趙交卸辭甚堅決曹王遂稟諸胡請示辦理胡以禹民抗命許強力取代禹紳聞之恐釀巨變竭力斡旋事將解決曹王見無可藉口乃更設爲發難之計於陰歷年關將相當供給迫令呈繳後曹士英忽遣馬弁護兵數名持河南銀行印有京津等字廢鈔五萬元到商會兌換並言奉旅長命如敢違誤即自由行動商會哀懇

百端籌措數日幸爲兌訖而王祥生父親至商會謂年迫前款不敷分配可再借四千元不用紙幣限二日繳足時值歲暮現款極難況甫經羅握何處籌措轉瞬逾限而大難作矣

二十八日早起頗寒某君已出門詢其妻謂營中有事甫明即遣人來喚當匆匆隨之去矣飯後因西大街某號室人亡時曾爲周轉余今年無力償還思登門乞寬假時日兼道歉意至該號適主者亦他往餘夥甚忙未便多話獨坐庭中待之未幾主者歸聞余坐候趨與晤余極致愧詞主者慨然曰此區區何足言王團長索款期限已逾先生聞之乎陝軍素行盡人皆知前途如何大不可料昨紳商聯電胡督辦哀訴因吾縣電局不能收發已專人赴襄城拍出惟至今猶渺無覆音各商家懼甚咸惶惶不知所措先生之債尙足齒及耶言竟憂現於色余忽憶某君今日被召之早亦不覺悚然欲覓某君一詢遂辭主者歸過十字街遇老友韓君邀至其家小坐且云君成孤鶴我早思慰君寂寥頃與

大兒言擬請君至舍下度此年節何如余曰感君盛意好在我有佳賓以歌以醉聊可自解不敢擾君也並告以適間所聞急須走覓某君一探究竟韓曰我無所知事雖可慮然以情理度之何至若此吾輩老矣瞻礪日迫尙能著幾牋展君勿輕聽且看我近作春聯如何嗚呼孰知吾友之言竟成讖語而白髮垂幕寶樹森階更孰知一夜一日間老幼駢戮片瓦不存耶悲夫在韓宅談終日歸已萬家燈火沿街童稚三五結羣咸笑話過新年噫又孰知此混混噩噩者乃亦轉眼半入鬼籤乎傷哉抵家某君猶未回就燈讀七家詩數首意以待某君至街頭報二鼓而某君仍未歸余不憤遲眠乃解衣沉沉睡去一覺醒來轉側間又聽報四更方念不知某君歸未忽隱隱聞響聲亟離枕諦聽之一念未及轉而響聲大作矣砰礮齊鳴勢如連珠喊殺之聲相繼四起余知必有巨變亟披衣下床未及開門某君妻亦聞聲抱子戰慄喚問余反詢以某君答竟夜未回余無奈只好竭力安慰之令近窗伏地萬勿妄動並告以吾家無長物決

不至波及請放心勿恐余則蛇行至門視關閉甚固復返坐室中聽之但聞槍聲愈密喊聲愈急若遠若近滿城鼎沸直至東方既白猶未稍休二十九日晨城內混戰未已城外又有鎗聲連續不斷自遠而近約一時傾城內轟擊益猛勢同山崩響震屋瓦至九時餘奔馳聲追逐聲呐喊聲復同時並厲又半時許音響漸遠若退城外市中亦漸平靜余伏門隙窺之須臾稍稍見人行謹密之竟非兵士喜甚遂放胆開門出而詢問是時大小人家亦多有開門出入奔走觀望者各街雖間有死屍橫地然多服兵服料無辜百姓尙無大傷亡不禁私爲慶幸詢視一過方知夜間係王祥生忽調兵自北門入將警察商團包圍勒令交出械彈且欲強入西大街警團不允遂開槍互擊始而警團據街柵與戰繼則登屋散布臨高擊下巷戰通宵王漸不支天明正欲退走適近城民聞城中槍聲以爲土匪進城搶掠馳來援救遇王又迎頭痛擊之曹王所部皆狼狽逃出城外斯時城內已無陝軍踪跡警團並未跟追僅將四門

嚴加守護紳商聚議簽以前電胡督迄未得覆今事如此倘胡督怒責誰敢担当不若請知事出城調停酌送槍械若干醫葬費若干總期息事爲要蓋以知事亦陝人新蒙胡督牌委二十六日始接篆視事或可曲爲周旋而不知曹王於戰端起後料難取勝夜間已飛電胡督請派大兵來屠我矣議定當相偕謁知事而知事竟不可得詢其署中人謂知事亦甚不以王爲然適往晤王被王喝令部下痛毆聞已怒赴省將面請督辦作主衆聞之以知事已進省稟報當不難水落石出咸稍安心各分頭商辦善後及守城事可憐巢禽幕燕猶在夢中而死期已屆尙草草作勞人悲夫日將夕城中忽又大亂咸謂由和尙橋開到軍隊甚多已圍布城四面傳說未已城外轟然巨聲頓作槍聲亦聯貫續起砲火激盪震耳欲聾殺氣烟塵昏然與暮色籠罩全市余屋上亦時聞槍彈飛越聲街頭且有中流彈死者亟復閉門又叮嚀某君妻余亦蒼黃悄伏室中風勁夜沉殺聲彌邇天翻地覆滿城沸騰未幾火起矣東北兩面同時並作食傾

西方亦熊熊然燭天至夜半後槍聲稍稀而棟櫓折慘呼哀號太火爆射之聲又復紛然盈耳徹夜不絕唯吾南街附近余室之處則尙無著火者初一日朝曦已高暗淡猶甚濃烟奇嗅時時隨風吹來撲人鼻觀恐怖中陡憶今日爲己丑元旦念中國之大此日此景如吾禹及余者恐無其二復念當代衰衰諸公當此佳節斯時正家人父子團聚一堂稱觴致賀歡笑融融又安知人間尙有俯首就戮屍骸狼藉烽火連天吞聲待死如吾禹及余者乎思潮起伏悲憤交集方癡想間忽門外剝啄聲甚急余大懼應否不知孰可繼聞呼余姓而先生者定神細辨識爲某君語音不復顧及其他亟開門納之某君入即曰速大書一曹旅某營保護紙條貼於門首趣辦勿延余不暇追問立照書貼竟始閉門返某君迎勞曰敝眷累公矣然此變僕實不知前早被喚往方微有所聞但已勢迫事促不能歸報夜間戰起警團勇不可當長官知不易敵急電開封請求援應及民圍入城我軍愈不能支遂退走城外本擬遠退適接探報

督辦已飛電鄭州岳師許昌豫旅就住宿車上軍隊各派一團至和尙橋會合飛馳來援我軍有恃乃駐以相待午後鄭許兩團相繼開到略事休息即會同四面進攻王團長且告衆禹縣極富大家發財就在此次他團營亦懼然應之傍晚攻入警團猶沿街死拒相持頗久至四門皆破始知援軍衆多不能抵抗遂由西大街整隊突圍出西門而去當開始攻城時旅長曾擬下令凡近城十里以內五歲以上者悉殺無赦賴前歲旅長在此所納之妾以鄉土關情痛哭哀求長跪不起令始未下乃改命凡城內有關係人家可書一某團某營保護字條粘貼門外以便識別而免殃及僕昨夜未入城故今早急歸令公書之吾家門首已有此且居近電報局督辦時有電命來各長官恐致遺悞已派兵守此一帶不許放火公請勿慮可稍安矣言訖又張皇出自變起至是計余不寐不食者已一日一夜有半筋力就衰那能堪此聞某君言心略舒思稍進食顧食至而不能下咽憊極頹然欲眠顧合眼又不能成寐無已復坐起側耳遠聽

而火聲哭聲間以鎗聲仍慘雜不絕燈時某君復歸至余室相視淒然有慘容  
詢以外間事某君長歎曰今日所經不啻入惡魔世界若等非但無心肝實全  
無人性僕不幸被命爲臨時稽查又不能閉目不視回憶之猶足使僕驚魂動  
魄早間僕去後將至東街遇兵一羣押解男婦老少約百餘名驅入數家須臾  
又有兵由北押來男婦約五六十名亦分驅其中當門密塞棹椅席薦之屬潑  
洋油其上各兵以一二三爲口號同時放火烈燄飛騰室內哭叫慘切而兵則  
拍手譁笑四週圍觀間有欲冒火衝出或被火逼迫登屋圖逃者羣兵又以亂  
鎗擊之僕不忍再睹亟走去進西大街柵欄擾攘中見某商號廊柱上綁一人  
數兵正持刀支解一臂一腿已斫墮地下舌已拔出血從口涔涔滴嚎已不成  
聲面血污模糊而兩目怒睜猶直視人俄一排長來驗之曰可矣趣解下投之  
火詢之旁兵士始知爲保衛團團長張君湧泉也折至康家拐（地名在禹縣  
北門內）一片灰燼中有多數兵士圍聚於燒殘破屋間趨前視之敗堵內橫

陳二十餘少婦皆驚悸無人色淚漱漱下牆隔尚有女屍八九血流猶浸浸未已各兵輪流爭就獸慾百出且有歡笑大呼者曰誰敢執拗可拖送牆隅忽二兵爭就一婦一兵拔手鎗擊其敵衆大譁謂不應如此擊人者不服適一官長過衆請其評判官長亦無法排解笑向衆曰城內正多何必爭此殘花回首命所隨三護兵各出自來得對準橫臥諸婦轟然一響畢盡其命衆鳥獸散僕亦行轉念此數婦既受汚又不免死何如牆隅人作清白鬼耶且行且思不覺登城城外餘燼死骸雖亦遍地然紛亂情形似尙較城內爲佳至西門門外橫屍一具有一婦蓬頭垢面抱子伏尸而哭城上兵士見之其一曰我立此能一鎗擊死婦孺二人其一曰汝決不能更一兵亦不答話便舉鎗擬之呼曰看我（讀哦音秦人土語）果一彈穿婦孺同斃衆咸稱獎不止未幾又有一老者白髮駘背手持一繩一少年肩棍相偕來見婦孺狀大駭老者似痛極而踣少年亦放聲號咷既伏視婦孺又奔扶老者睹其倉皇令人心碎衆兵噪曰厭物厭

物僕方欲勸止羣又一排鎗擊殺之僕恨極掉頭而下一路歸來呻吟哀呼到處皆聞通衢卑巷縱橫皆屍尤慘者婦屍多坦胸而無乳孩屍半頭破而腦流其餘不及備言願公亦勿再問徒增悲傷事已如此無可奈何不如且休遂辭歸寢唯余念鄉懷舊感逝哀生終夜仍不能成睡將明火稍息鎗聲亦漸住

初二日某君仍早出外間聲息亦較爲平靜近午比隣張君隔牆低聲告余曰聞今日已准人出城街上亦任人行走不加禁止我欲即去君將如何余曰甚善唯余須告某君請準備我先送君到外間一觀張曰諾余遂入告某君妻出送張行張一妻二子幸皆無恙相隨偕逃路上扶老携幼紛然雜還兵士亦三三五五荷鎗雜難民中任意嬉游以故雖有相識者絕無敢立談片刻稍致問訊偶相值不過含淚點首示意而已到南門檢查極嚴遂人搜尋尋訖放出衾裯微物尙許提携自隨余遠立張望目送張君一家驗畢出城默念此脫籠之鳥其中心愉快或可償數日苦楚猛憶老友韓君未如何亟往視之及至但見

瓦礫成堆餘烟未息而吾老友則血肉狼藉握拳齧齒仰死地下其二子一孫亦各身受數刃被殺於百步內外余此時真如霆雷壁頂神喪魄散氣湧耳鳴幾不知置身何所俄一兵過呼曰某先生乎胡呆立於此余聞呼神始復轉視係某君營中之兵常至余家故相識亦負鎗佩彈猙獰可怖余應曰無他覓某君耳兵聞言不復問乃駐足與余閒話指吾友曰此老頭子凶甚前夜有某營弟兄數十人至其家此老頭子手執大刀率二三壯年伏門後拒拒罵大呼必拚幾個害人之賊死方甘心某營弟兄竟被其砍死四名重傷者復五六名後將其房舍燃燒彼家婦女爭奔此老頭子厲聲橫刃迫使退回眼看全家燒盡始偕壯年突出又殺傷二三方被衆以刺刀戳斃先生知之乎曰不知兵又曰先生欲尋吾書記官可躡吾行余只好忍淚從之行時此兵復告余守南門東門者爲岳師蔣旅守北門西門者爲曹王所屬吾部並言吾部所得財物僅五百餘車而岳師蔣旅載至許昌和尙橋二處者已及吾數現仍陸續裝運未

免不公云云至北街口與某君遇問何往余亦以相覓對遂捨兵從某君行至  
北門形勢大異於南守兵皆執鎗露刀凡欲出城者携物均須留下無男女又  
須褫衣嚴檢男則將衣脫盡或敲或罵百般留難始令出門女則撫乳摩胸探  
裳握手甚有故令解中衣露下體以資調笑余萬不能耐掣某君衣示令同歸  
方回身遙見車四乘駕八駿外各坐二兵洋洋然來及近余識爲城內某富室  
物更視之方見車內尙各有青年婦女一綠鬟靉鬆紅淚洗面被縛其中且有  
破口惡罵求死者蓋某富室之閨媛及其令媳也余不禁失聲車上兵聞之忽  
提鎗下指余問汝爲何人幸某君在側代謂此吾居停老病孤貧無他意請各  
自便兵悻悻復登車揮令揚鞭去歸家天已昏暮晝行街市間時聞焦屍及血  
醒氣臭不可忍加以數日未食未眠頭痛欲裂乃商某君明日務請設法送余  
離此地獄某君曰吾尤豈能與此禽獸斯須處乎公明日行吾後日亦必去可  
各檢點待吾相機而動初三日余尙未起遠聞叫囂甚烈亟著衣出觀見兵若

千鳴號列隊而來前商務會長梁化三赤膊被綁遍體鱗傷俯首隨行身負布一方大書遺誤軍需特令遊街示衆倘明日仍敢故違著即槍決等語知梁尙不至即死心爲稍慰忽又聯想吾友祖孫父子猶露屍街前思再一視遂步往至則其戚某君尙未去已爲之經營棺殮矣扶棺長慟不敢出聲久立更恐招禍揮涕拜之而別沿途屍骸今日已不多見丐者正爲扛抬亦不知誰令爲之埋至何所默觀城中東西北三區幾盡成焦土南街尙留片地康家拐一帶各藥行堆棧焚燒尤酷城郭依舊景物全非華表哀鳴何須待化鶴歸耶思之倍覺黯然過電報局門前遇余所負債某商號之夥友自內出余招之近問其主者夥友左右顧若不能出諸口余窺其情邀其赴余家小憩以便探問至舍夥友蹙額曰不圖尙能相見自亂起吾號左右胥兆焚如街上又飛彈如雨當時思維逃則必遭彈穿伏則亦不過燒死與其洞腹不如完軀故將門緊閉坐而待亡幸吾號僅燒其半即已止息方互欣慶不料昨日黎明忽有數軍官

帶兵甚衆破門而入而某號之長某號之東某家之主人累累若貫珠皆以索牽之行吾主者亦被縛而去吾等皇恐失措莫知如何將午又有一軍官來告謂汝主者頃已問過罪不至死判罰洋兩萬元速備款來贖違即加罪槍斃又曰須知吾儕駐汝禹久顧念交情皆從輕罰辦東街劉寡婦子被新來某團傳走罰以十萬少抗已殺諸其門矣言竟譁笑去吾等方悉主者可救遂四出探求孰知如吾號事者甚多與吾主者同去之數十人或罰數萬或罰數千且每街又須另繳保險費西街七萬南街四萬余家巷三萬而每家更須至少各繳四百元是爲已下令確定者其餘尙不可知此間安所得錢况各家又皆苦苦張羅吾等無奈思電許昌襄城求爲集湊故適由電報局出也少停復曰不知誰告軍隊中人謂各商家後院井中亂時皆將現銀投入（禹縣習慣各商家後院大半皆有一井）以故各兵或捉路人或逼未去之夥友到處下井爲之撈物多獲者尙可博其歉心哀求復上倘井中實無所有或有而甚微取而已

盡便以槍對井口下射而井中人死矣故吾等目前不惟籌欵難且不敢歸奈何奈何送某夥友出門難中相別兩爲依依不覺與之偕行遠忽大街曲巷兵士驟多捉入人室來往如織有反接而棒打之者有以槍柄擊其腿而刺刀割其臂者老婦稚子亦被騙滿途涕泣亂竄問其故知爲奉命搜查有無私藏槍械其被捉而受打者因搜未出而又不知敬奉別物也余恐或致冒犯即折而歸繞行室中益覺萬不可留而落日蒼茫又黃昏矣須臾某君回呼余曰今夜某營又輦物赴許僕已託之公可隨去立時便發保無恙也余乃與某君夫婦及余同經患難之數掾老屋愴然作別車聲鱗鱗夜色淒迷回首城闕曷可勝河冰關曉隨燕逐秦之痛

余到許後首先所見者即陝軍中人紛紛持物出售衣服衾枕案燈棹椅箱籠磁鐵之屬無所不備每至商家便迫令收受且明告人是爲打破禹縣所獲吾官吾兵各有所分吾不賣汝等更賣給誰耶各商家亦只有忍氣吞聲應之其值

更惟命是聽禹民以失之而家破余恐許昌之人反將以增之而破家矣越二  
遇同縣某君此君鄉居亦避難而來問之方知城外亦無幸免如鄉富李元順  
闔家男女二十餘口全被殺戮無一獲存豫文淵父子家人被閉室中付之一炬其餘村鎮殺傷焚劫無處無之更難枚舉又數日晤一紅十字會中人謂  
據確實報告此番禹縣損傷現已得知之數房舍焚燒一萬餘間男女屍骸七  
千餘具而鄉中火中調查未週搜尋未出者尙不與焉更數日同寓某君自鄭  
州函余言已辭職並謂被打之禹知事爲督辦親近督辦因知事故已將王團  
長解省槍決旅長刻亦到鄭擬一謁再去惟督辦囑其勿會客勿出門故僕或  
須多遲幾日也云云復聞之許人全寨（許昌屬在縣西鄉）某日有陝軍自禹  
運來箱篋十餘車另四車頗麗都各載一白皙女子迫寨人開門投宿夜一女  
子罵不休被憒胸死翌早又馳去不知載至何所矣年內外河南北沿鐵路各  
縣如臨漳安陽西平遂平等似禹事而傳之許者不知凡幾不過燒殺略減情

形較輕耳嗟乎嘉定屠城揚州十日異族之憑陵也李自成之酷暴張獻忠之  
虐殘流寇之所爲也孰意自號民黨而國民軍煌煌爲政府所任命之督辦乃  
亦復出此政府固如是乎民黨而國民軍者固如是乎吾爲禹哀爲政府羞且  
爲民黨而國民軍者痛也今世界各國競重人道請觀吾豫竟不能望朝鮮安  
南矣怨之徒也奈若何哉余老且弱家山殘破羈旅無歸蘭成作賦空哀江南  
王粲登樓惟有流涕淵昊天憐佑俾一日生存誓當長齋日禱果報昭垂吾不  
信明神厲鬼便毫無靈爽也噫

上海图书馆藏书



A541 212 0011 0054B

